



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tir_yimym

tir yimym TAPAK 8

**India-China tesendaktep
tajungba kumogo: S Jaishankar**

**Australia nunger tennis
asayar Neale Fraser süogo**

VOL. XXII ISSUE NO. 55 (ADOK 55) DIMAPUR RASEMNÜ (WEDNESDAY) LUCHII (DECEMBER) 04, 2024 ₹ 5.00

DAYO-i NFHRCC pusema nungiter

Dimapur, December 3, 2024 (TYO): Nagaland Foothill Road Coordination Committee (NFHRCC)-i Mon district kübok Tizit nungi Peren district kübok Khelma tashi Naga nungeri aginüa aliba lenmang yangluba maparen nung Dimapur Ao Youth Organisation (DAYO)-i pusema nungita arur.

Nagaland Legislative Assembly 2024-25 budget session nung Special Assistance to States for Capital Investment kübok Foothill Road atema Rs 148.5 crore lezmüksüogo saka

tang tashi iba mapatong atema work order magütsür anungji NFHRCC-i anogo 4 nü züngzüksüba nung onok adener aser pusema nungiter, ta Media Cell, DAYO-i metetdaksü.

Iba mapatong ya khenyongi balaka lir kechiyong ali kiburtemi senotsü kecha magüi dang ali tenlaogo aser Naga Political Groups (NPGs) shinga nem-a sen magütsü. Iba lenmang re-alignment asütsü atema official Committee-i mulunga agizüka inyak mesüra kodanga memelatsü ta DAYO-isa ashi.

NPCC-i Amit Shah den amenba osang metetnüir

Dimapur, December 3, 2024 (TYO): Chief Minister Neiphiu Rio aser par cabinet züngsemtemi Union Home Minister Amit Shah aser tanga central lennirtem den senden amenba osang melemsatepba atema tebilemtsü abener ta Nagaland Pradesh Congress Committee (NPCC)-i metetdaksüogo.

NSCN (I-M)-i ceasefire agiener akhi ama prangpong amer raratsü amokmerenba sülen CM Rio-i anir par cabinet züngsemtemi Union Home Minister den ajurutep saka tang tashi osang kecha maliba ajanga public terata ka nung lir ta NPCC-i ashi.

"Kanga dang tongtipang

senden ka amenba sülen sorkar nungi osang kecha magütsüba ajanga nübortem ratar aser shisabuluteper. Chief Minister aser par cabinet züngsemtemi tensa dak rangloker senden nung lemsatepba onüktem yimjak nung ashitsüla, ta NPCC-isa metetdaksü.

Naga yimten tebilemtsü atema olemtepertem tsüingda ken o tem angateteptsü meranger ta public dang mashiba ajanga temulung melemtep tali adoktsü ta parnokisa ashi.

NPCC-isa state sorkar dang osang metetdaksütsü aser tashishitsü melii yimjung maparen inyaka aotsü ayongzükogo.

Toyota Hornbill Music Festival 2024



December 3, 2024 nikongdang Estampas Del (Peru)-i Toyota Hornbill Music Festival 2024 nung shilem agiba angur.

Kohima, December 3, 2024 (TYO): 25 buba Hornbill Festival 2024 nung shilem ka ama Naga Heritage Village, Kisama nung Toyota Hornbill Music Festival 2024 anogo asemnübuba mongogo.

Tanü Music Festival nung 2 Indias, Jonathan Yhome,

Estampas Del (Peru), Nchanter, Exi aser The Electric Cool Kid nungeri shilem agia liasü.

Day 4 (December 4) nü Main Arena, Kisama nung nikongdang 5:00 PM ako nungi Arogya, Version2 aser Rain in Sahara nungeri shilem agitsü.

Hornbill festival ya alima nung lisopur benjung tulutiba



Naga Heritage Village, Kisama nung December 3, 2024 nü Union Tourism Minister Gajendra Singh Shekhawat pelashishia agizükdang agiba noksa ka angur.

Kohima, December 3, 2024 (TYO): Nagaland nung amongba Hornbill Festival ya alima nung lisopur benjung tulutiba lir aser iba ajanga tarutsü nung Nagaland aser North East region atema tourism maparen ajungketsü ta Union Tourism Minister Gajendra Singh Shekhawat-i ashi.

Naga Heritage Village, Kisama nung Tikhir morung nung osangbener den jembidang "taküm ya küm tajung ka lir kechiyong asenoki 25 buba Hornbill Festival amonger aser iba ajanga benjungtem rongnung benjung tamaitü ngutetogo" ta pai ashi.

Nagaland nung kin 18 prong

adenshir shilem balala ajanga pei pei sobaliba sayur aser küm metsür pungu süia arudang iba benjung ya 'international festival' ka kumogo. Alima kübok tesem balala nungi kenten aser sobaliba iba benjung nung lemsar, ta Shekhawat-i ashi.

"State sorkar aser Tourism Minister Temjen Imna Along nungeri iba tobur tajung benjung ayongzüksü atema meranga inyakba aser alima ajungalen benjungtem rongnung benjungtiba kümdaksüba atema tenüngsang agütsür" ta pai ashi.

"Alima tesem balala nungi nisungtem arua lir aser parnokisa iba benjung repranger. Parnokia

iba benjung ya tajung ta ashitsü kechiyong iba ya alima nung lisopur benjung tulutiba lir" ta Union Tourism Minister-i metetdaksü.

Iba benjung ajanga Nagaland aser North Eastern state tem nung tourism lenmang aika lapoktsü ta paisa ashi.

Union Minister Shekhawat ya anüing agiba sobaliba session nung tongti tesemdang liasü aser partner country- Japan-ia Drum Tao shilem agia loasü.

Union Minister Shekhawat den Minister Imna Along nati Tikhir nunger sünkong atsüba nunga shilem agia liasü. Naga nunger 'officially recognized major tribe' rongnung Tikhir kin ya tanubosang lir.

Tikhir nungeri bener aruba sünkong ya Indo-Myanmar international border arütsü anasa 139th pillar nung Pokphur yimtsüing nungi bener aruba liasü.

Hornbill festival nung nisung meyrjang 50 tema denogo

Naga Heritage Village, Kisama nung 25 buba Hornbill Festival asemnübuba tashi amongdang nisung meyrjang 50 tema adenshiogo.

Anogo asemnü benjungmong nung nisung 57,585 arua aden, parnok ya foreigners 1258, domestic tourists 14,225 aser locals 41,102 liasü, ta Tourism Department-i metetdaksü.

Governor-i TB-Free Nagaland alizüing atongtsü ayongzük

Kohima, December 3, 2024 (TYO): Nagaland Governor La Ganesan-i Nagaland nung yimtenren lennirtem, sorkar ketdangsurtem aser civil societies dang TB agi shirangertem yariba Nikshay Mitras (supporters) kümer TB-free Nagaland and India kümdaksütsü ayongzükogo.

"Asenoki pei pei tesem nung TB agi shirangertem adopt südi aser iba mapa tajung ajaklen prokshidi. Asenok külemi inyakba ajanga sorkari TB anema inyakba tashitaitba kümdaksütsü" ta Ganesan-i ashi.

Mongulbarnü Raj Bhavan nung Pradhan Mantri TB Mukh Bharat Abhiyan amongdang pai iba tayongzükba agütsü.

"Nagaland-i Pradhan Mantri TB Mukh Bharat Abhiyan nung shilem tajung agiba atema nüma atanger. Alima nung tuberculosis (TB) agi shiranger teimbaji India nung lir aser kümhshia nsiuing lakh 28 dak iba tashidak agi kongshir" ta Governor Ganesan-i ashi.

Asenok külemi yaritepa TB anema inyaksüla aser nungdakba chiyungtsü (nutritional support) agütsüra TB agi shiranger 50% agi tajemba akümtsü, ta pai ashi. Nagaland nung Nikshay

Mitras 410 shi kati TB agi shiranger nisung 1,000 shi yaridar aser iba tangatetba nung maneni yaritepa ora TB-free Nagaland, aser tatem nung TB-free India alizüing atongtsü ta Ganesan-isa metetdaksü.

"Asenok loktii külemi aria bilema aser mapa inyakra TB-Free India nükjiding tongtetsü" ta pai ashi.

"Centre sorkari tenzükba Nikshay Mitra Campaign tejakleni aoba atema tenüngsang agütsü. Maneni Governor Ganesan-i TB agi shiranger nisung 36 yariba atema pelar" ta Tourism & Higher Education Minister Temjen Imna Along-i ashi.

Prime Minister-i 2025 tashi nung TB samatsütsü alizüing yua lir aser iba UN Sustainable Development Goals (SDGs) jakdang küm pungu jelia lir, ta pai ashi.

"Loktii pei sasa mulungteta inyakba ajanga osang prokshiba dang masü saka TB agi shirangertem senzüka yutsüba aser bendanga amshiba tangatetba agientsü" ta Commissioner and Secretary of Health and Family Welfare, Anoop Khinchi-ia ashi.

"India sorkari TB Mukh Bharat ayongzükba ama sorkari lemtet tajung agira aser civil societies-i pusema nungitra asenoki alizüing atongtsü" ta pai ashi.

"Nagaland nung TB agi shiranger teimba puteter aser tashidak azüokba mapa nunga takok ngua inyakdar. Dimapur district nung TB agi shiranger teimtiba lir" ta NHM Nagaland Mission Director Dr. Akuo Sorhie-i ashi.

Nikshay Poshan Yojana ajanga screening, contact tracing, aser nutritional support ya kanga tongtipang lir aser iba ajanga TB agi shiranger nem senotsü teimba agütsür, ta pai ashi.

Sorkarisa TB Mukh Panchayat Initiative ta ser yimtsüingtem nung TB dak sendakba tayongzükbatem koktetsü atema mapa ka tenzükogo. Nagaland nung yimtsüing 73-i 2023 küm TB-free status nguogo, ta Dr. Sorhie-isa ashi.

Linüki 2025 alizüing yua aliba tongtetsü atema December 7, 2024 nungi 100-day intensified TB elimination campaign tenzüksü sentong lir, ta laisa ashi.

Mokokchung nung International Day of Persons with Disabilities amung



Ongpangkong Salang, Mokokchung nung December 3, 2024 nü International Day of Persons with Disabilities amungdang Maong Jamir-i jembidang tangokba noksa ka yangi angur.

Dimapur, Luchii/December 03 (TYO): Mokokchung nung "Amplifying the Leadership of Persons with Disabilities for an inclusive and Sustainable Future" omen nung ajemdaker Nagaland State Rural Livelihoods Mission (NSRLM), Mokokchung, aser Mokokchung District Disabled Forum (MDDF) lungjemer December 3, 2024 nü Ongpangkong Salang, Mokokchung nung International Day of Persons with Disabilities munga liasü, kong onük jembir Maong Jamir, Secretary, Finance and Property, ABAM liasü.

Iba sentong nung jembidang loktiliba nung PwDs tem senzüka yutsüba indang pai ashi aser danga linük nungbo parnok ya temoatsü ka ama

züngshir ta shia liasü. Pai PwDs tem yimya ka ama tajunglen nungi agizüksü ayongzük aser Laishiba nungi athishia jembia liasü.

Pai arogotem dang matamabensar dak rangloker mission mapa balala inyaksü ajungshi aser lokti dang senotsü tashi nung masü saka sempet nung rangloksü ayongzük.

Iba sentong nung District Administration Mokokchung nungi Temsuchuba, SDO (C), Ao Senden nungi tongti zülur Imtipokyim, Mokokchung Ao Officers Telongjem nungi tir I Lipok Jamir aser Vesupra Kezo, Sr. SP Mokokchung nungeria o tatsütsü jembia liasü.

Iba sentong nung Asanaro Kichu, Area Coordinator, NSRLM, Mokokchung menden liasü, Lanukumzuk,

Pastor, Khar Baptist ajanga sentong tenzüka sarasadem aser Benjongsenla, APW Chuchuyimpang Baptist Church ajanga sentong tembanga sarasadem.

PwDs nungi Opangtemla ajanga temeja ken ka aten aser PwDs atema Kikum Longkumer, Pastor, Kumlong Baptist Church ajanga sarasademsü, Mr. Moatoshi, Assistant District Programme Manager, NSRLM Mokokchung ajanga pela agizükba o jembi aser Arenlila Jamir, Advisor, MDDF ajanga iba anogomung ratet shia liasü.

Kasa mapang MDDF tiri PwDs ajunga nem February 17-19, 2025 anogotem teyari agütsütsü ta ashi aser PwDs ajunga dang UDID cards bener arutsü nenshia ashi.

Kisama nung Stilt Bamboo race ayongzük



Dimapur, Luchii/December 03 (TYO): Department of Youth Resources and Sports ajanga ayongzükba karatsü asemtepba (Stilt Bamboo Race) sentong Naga Heritage Village, Kisama nung December 3, 2024 nü agia liasü.

Kib balala nungi tebur 18 aser tetsür 14 den raliwalir nungia tebur pongu aser tetsür pezü-i iba sentong nung shilem agia liasü.

Teburtem rongnung

Yimkhiung kin nungi R. Thsankiu-i mezüngbuba jenjang ngutet aser Sümi kin nungi Heroto aser Tikhir kin nungi M. Tsinthong nati tanabuba aser tasembuba jenjang nguteta liasü.

Tetsürtem rongnung Phom kin nungi M. Tensunaro-i mezüngbuba jenjang ngutet, Sümi kin nungi Mughavili aser Tikhir kin nungi T. Repaishe nati tanabuba aser tasembuba jenjang nguteta liasü.

Tebur raliwalir tem rongnung USA nungi Alex-i mezüngbuba jenjang, Bihar nungi Rahul-i tanabuba jenjang aser Nepal nungi Aadesh Rai-i tasembuba jenjang nguteta liasü.

Tetsür raliwalir tem rongnung USA nungi Charlotte-i mezüngbuba jenjang, Sweden nungi Ronja-i tanabuba jenjang aser Andhra Pradesh nungi Sunita aser Gurgaon nungi Shweta nati tasembuba jenjang nguteta liasü.

CM-i Media Facilitation Centre semdang

Dimapur, Luchii/December 03 (TYO): Nagaland Chief Minister Neiphiu Rio-i December 3, 2024 nü Hornbill Festival 2024 nung shilem ka ama Naga Heritage Village, Kisama nung Media Facilitation Centre semdanga liasü.

Iba Centre aja Department of Information and Public Relations ajanga amenok, koba state nung benjongmung tulutiba indang osang abener yaritsü nükjidong nung amenoka lir.

Chief Minister-i iba tesem semdangba mapang

osangbener den sensaksem aka aser Department of Information & Public Relations ajanga nüngdakba mera agia iba ama tesem amenokba asoshi tenüngsang agüja liasü.

Iba Centre ajanga high speed internet agütsür, mapa inyakba tesem den süngojemtsü agütsür.

Chief Minister-i iba tesem semdangba mapang pa nem Hornbill Festival Media kit agüja liasü. Hornbill Festival osang abenba nung iba Centre yagi osangbener lenmang balala nung yaritar.

Kisama nung Tikhir kin-i süngkong atsüba sentong ayongzük



Naga Heritage Village, Kisama nung December 3, 2024 nü Tikhir kin-i süngkong atsüba mapang tangokba noksa ka yangi angur.

Dimapur, Luchii/December 03 (TYO): Akhi mapang Tikhir kin asoshi süngkong (log drum) yagi tongtipang shilem agia aru. Parnoki süngkong ya takok anguba, yimchijung aser ochi temaitsü ka ama amanger aser tongpang nung shilem tongtipang ka ama züngshir.

Arem min nung süngkong achiba mapang lenirtemi mezüng süngdong shimer aser yangji maitüsü nok agi lepa yutsür aser mezüng süngo tu tajem tsükra arishi aser yimchijung sayur, aser süngo tu takong tsükra par kin asoshi timtem

ama amanga aru. Tikhir Naga nunger sobaliba nung süngkong ya süng agi yangluba oset ka dang masü nüburtem anüker aser arok tanüla temaitsü ama aten-ananga aru.

Mongulbarnü Naga Heritage Village, Kisama nung parnoki atsüba süngkong ya Indo-Myanmar international border nung pillar 139 buba nung aliba Pokphur nungi liasü.

Iba süngkong atsüba mapang raliwalir temia shilem agia aser tejangraba tulu nung repranga liasü.

Wokha nung Pro Fitness Gym semzük

Dimapur, Luchii/December 03 (TYO): Deputy Commissioner, Wokha, Vineet Kumar, IAS ajanga December 3, 2024 nü Tsumang "A" Colony, Wokha nung Pro Fitness Gym semzükja liasü.

Iba gym semzüktsüba mapang Deputy Commissioner ajanga lanur entrepreneurs ana, Ren Khuvung aser Taku Jamir nati lanurtem ajungmesoa iba ama mera agiba atema tenüngsang agütsü aser lanurtem dang pei mangdang aser nükjidong sülen anidaksü ayongzükja liasü.

Iba gym lapokba ajanga lanur aika mashi lenmang nung menemzüi temang anema aliba nung temlung agütsütsü, ta pai ashi.

Asenok temang anema alitsü atema anogoshi asen takum nung asentzü nüngdaker, aser temang

anema alitsü asoshi tanur-tain temi maongka agitsü iba ya sapang ka lir, ta DC Wokha ajangasa ashi.

Iba sentong nung tetoshi tesemdang ka ama nüngtugu body builder aser Mr. Nagaland 2022 aser Mr. World 2021 jenjang pongu buba tongtetsang Moalong Yaden-ia lanur entrepreneurs dang pei tejangraba mesamadaksüi ayutsü ayongzükja liasü.

Nenok mapa ngua lanurtemi takum nung pei nükjidong nung takok angutsü asoshi ajungmesotsü, ta Yaden-i ashi.

Associate Pastor WTBC, Samuel Ovung ajanga iba tesem meshiteta sarasademsü aser Ren Khuvung ajanga Pro Fitness Gym indang tongmelang agi lemsatep aser Taku Jamir-i melepzüng o jembia liasü.

NAGALAND POLLUTION CONTROL BOARD
Signal Point, Dimapur - 797112, Nagaland
Tel: 03862-245727, TeleFax: 03862-245726
Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY
KOHIMA ASER DIMAPUR NUNG MOPUNG MERÜK-MEMERÜKBA JENJANG

| Sl. no | City | Location of air station | Type of area | Monitoring dates | | | 100 µg/m ³ |
|--------|---------|----------------------------|--------------|------------------|------------|------------|-----------------------|
| | | | | 26.11.2024 | 28.11.2024 | 30.11.2024 | |
| 1 | Dimapur | Bank Colony | Residential | 139 | 154 | 161 | |
| 2 | | Dhobinala | Commercial | 189 | 223 | 220 | |
| 3 | | NPCB Office, Signal Colony | Residential | 177 | 196 | 193 | |
| 4 | | Tenyiphe, Chumoukedima | Commercial | 72 | 98 | 106 | |
| 5 | | Nagarjan | Residential | 96 | 114 | 130 | |
| 6 | | Viola colony | Residential | 93 | 115 | 122 | |
| 7 | | Burma camp | Commercial | 146 | 159 | 179 | |
| 8 | Kohima | Opposite NST Office | Residential | 34 | 66 | 58 | |
| 9 | | PWD Junction | Commercial | 85 | 86 | 94 | |
| 10 | | High School Junction | Commercial | 126 | 133 | 162 | |
| 11 | | Midland (Upper) | Residential | 60 | 53 | 59 | |

Iba osang ya nübortem ajangzüksü atema Nagaland Pollution Control Board-i agütsür.

ALI AYOKER
Doyapur atuba lenmang nung Diezephi aser Ura na tsüngda alumang tuluka jenjang dalang agi lepsaa ayoker.
DIRECT CONTACT 9612846178 / 8837273643



Lok Sabha nung Opposition lenir Rahul Gandhi aser tanga Opposition MP temi Parliament nung longkak aitba noksa nung angur. Opposition-i Adani ken o, Sambhal nung tawa tatalokba aser tang ken o tem anema longkak aita arudar.

Parliament: Centre aser TMC na o langtep

New Delhi, Luchii/ December 3 (Agencies): West Bengal sorkar nem Mahatma Gandhi National Rural Employment Guarantee Act (MGNREGA) magütsüba atema Mongolbarnü Parliament nung Trinamool Congress (TMC) aser Centre sorkar na olangtepa liasü.

TMC MP Kalyan Banerjee-i Lok Sabha nung ashiba agi, West Bengal sorkar nem 2022-2023 aser 2023-2024 fiscal years atema iba central scheme kübok senotsü magütsü lir.

“Kechiba West Bengal sorkar sentoka toktsür? Kechiba sensaksem kecha maka? Nenoki Bengali nungertem mesaklokra nenoki Bengla nem fund magütsütsü asü?” ta Question Hour mapang Banerjee-i Centre

sorkar dang asüngdang aser Weat Bengal nung alirtem mezüngshiba atema Centre aija liasü.

Ken o dak sendakba nung telangzüba agütsüba mapang Union agriculture and farmers’ welfare minister Shivraj Singh Chouhan-i, West Bengal sorkari nisung kar ajangzüktsü atema project tulutem tilala küma yanglur benoker, ta ashi. Paisa, act indang provision tem tetshia, senotsü meshitaki amshira MGNREGA kübok fund tem lezmükja aliba sota ayutsü akok ta ashi.

“Scheme kübok non-beneficiaries tem beneficiaries tem ama züngoksema aliba nguogo. Village development scheme tem indang nungja melenshitsü, koba tim masü. Parnoki Pradhan Mantri Awas

Yojana nungja meleshia parnok nungja ka agüja aibelenogo. Maneni beneficiary tem atema agütsüba tajangzüktem non-beneficiary tem nem agütsüogo,” ta Chouhan-i ashi. Banerjee-i iba taitsüba ya magizük.

O jembiba mapang TMC MP yagi, centre sorkari fund dak sendakba nung ochi mashi inkayim aliba anema kecha jenjang magi. “Taoba küm onoki ochi mashi inkyim aliba indang angashia aruogo. Aibelen kar danga lira nenoki aji bushitetta aibelena alirtem aputsüla, saka nenoki aji minyak. Kechiba nenoki West Bengal nungertem Article 14 (of the Constitution) nung aibelener masü na?” ta Banerjee-i ashi.

India-China tesendaktep tajungba kümogo: S Jaishankar

New Delhi, Luchii/ December 3 (Agencies): External affairs minister S Jaishankar-i Mongolbarnü Lok Sabha nung o jembiba mapang, India aser China na tesendaktep tajungba kümogo ta ashiba den China den sensak asemtsü atema sorkar bendanga agütsür aliba indang jembia liasü.

Pai ashiba agi, tawa military aser diplomatic sensaksem ajanga arrtsü nung ken o bentetogo, kong October ita Line of Actual Control (LAC)

nung patrolling dak sendakba tenangzüktepa yangluba densema lir.

External affairs minister-i House dang ashiba agi, India aser China na tesendaktep 2020 küm nungi mejugi aruogo. China-i jenjang agiba ajanga arrtsü nung yimjung aser tesunep dak kongshiba sülen tesendaktep mejungi aküm.

“Sepiatem nem tenüngsang agütsütsü langa lir, kechiyong alinük ajanga tetsükdaktsü aika adokdaktsüba den Covid ajanga

timtem bener arujaka parnoki China nunger sepaitem nokdangogo,” ta minister-i ashi.

Tawa diplomatic sensaksem balala akaba aser terenlok balala ajanga India aser China na tesendaktep tajungba kümdaktsüdar, ta Jaishankar-i ashi. Paisa, China den sensaksema arrtsü nung ken o mebenteti alibatem bentettsü atema India maneni bendanga agütsür lir, ta ashi.

“Tarutsü nung onoki de-escalation aser arrtsü nung inkyim achayangtsü atema sensak asemtsü. Arrtsü nungi sepaitem aninba ajanga linük ana tsüngda tesendaktep asoshi tanga onük dak rangloker inyaktü atema lenmang lapoktsüogo,” ta Jaishankar-i ashi.

Taoba mapang tensa mejungi aliba aser arrtsü nung inkyim kar ajanga India aser China na tesendaktep ajunga nung kongshia liasü, ta pai ashi.

“National security tama südaksür tawa foreign minister Wang Yi den senden amenba mapang onoki special representatives aser foreign secretary-level senden yakta ayongtsü mulungtepogo,” ta pai ashi.

Arrtsü nung ken o ya ajaki agizükttetsüsa benoktsü asoshi China den maneni sensaksemtsü asoshi India bendanga agütsür lir, ta Jaishankar-i ashi.

Eknath Shinde temang anepalutsü atema mozüki-i anir ao

New Delhi, Luchii/ December 3 (Agencies): Maharashtra caretaker chief minister Eknath Shinde, temang tejungtuba makümba sülen Thane nung nija mozüki kati anir oa liasü.

ANI sangdong ka ajanga ashiba agi, doctor temi Shinde dang pa temang ajunga kanga junga tendangtsü atema tetuyuba agütsüogo.

Ajisüaka mozüki aoba mapang koma lir ta asüngdang dang Shinde-i pa kanga junga lir ta langzua liasü.

Shinde, Satara kübok par yimtsüng nungi shiranga Mumbai meyipa aruba sülen anogo ishika lir pa mozükidangi anirogo.

Kasa mapang nung BJP pur December 5 nü Mahayuti sorkar tenangzüktepa sentong agütsü renemdar.

Taoba mapang BJP lenir Girish Mahajan-i Eknath Shinde den ajurutepa tenangzüktepa agütsü aliba sentong indang sensaksema liasü. Mahajan-i ashiba agi, caretaker CM ya

temang kanga junga kümdar.

“Ni Eknath Shinde den ajurutepe aru, shiba taoba anogo ishika temang mejungi lir. Küna ghonda ka shi mena sensaksemogo. Paisa,

December 5 nü sentong indang jembia aser nia kü tebilemba kar lemsatepogo. State nung aliba nüburtem atema tinyaktsü aika lir aser onok longjemer inyaktü,” ta Girish Mahajan-i ashi.

Shinde, Devendra Fadnavis, NCP tekolakba Ajit Pawar aser tanga Mahayuti lenirtemi chief minister mapa atema lenir meshimteti aliba indang sensak asemtsü atema Brehostibar nikongtsütsü Amit Shah aser JP Nadda na den Delhi nung ajurutepa liasü.

Maharashtra assembly election results ya November 23 nü sangdong aser Mahayuti alliance-i takok tulu ngua liasü. Menden 280 nungi BJP-i aniba Shiv Sena aser Ajit Pawar-i aniba NCP nati menden 57 aser 41 koka liasü.

Tripura nung Bangladesh Mission-i Visa services sota ayu

New Delhi, Luchii/ December 3 (Agencies): Tripura yimtiba Agartala nung Bangladesh mission-i Mongolbarnü visa agütsüba inkyim sota ayu.

Bangladesh nung Hindu nungertem aser lokti nung nütsüng agi ajema aliba telok amakba anema longkak aita mapang Agartala kübok Kunjaban tesem nung amenoka aliba Assistant High Commission office amakba sülen iba jenjang ya agia liasü.

“Security tensa apir Bangladesh Assistant High Commission, Agartala nung visa aser consular services ajak osang tejangja ka magütsü tashi sota atatsü,” ta mission kishi nung osang agütsür liasü.

December 2 nü Agartala nung Bangladesh consulate telungi

nisung telok ka senoka aiba dak sendakba nung Mongolbarnü sub-inspectors asem mapa nungi suspend sütsüogo.

India aser Bangladesh na arrtsü nung aliba state Tripura kübok Agartala yimti nung Hombarnü Dhaka indang mission anasa nisung meyrejang aikati longkak aita liasü. Hindu monk Chinmoy Krishna Das apuba aser Bangladesh nung Hindu nungertem amakba anema nüburtemi longkak aita liasü.

Osang ajang ashiba agi, longkak aitertemi Bangladesh indang Assistant High Commission office telungi ai aser osettsütem raksaja liasü. Iba tatalokba ya kanga tia maka tatalokba ka aser kanga sasa bilemer ta Ministry of External Affairs (MEA)-i shiogo.



1984 küm Bhopal gas lendong nungi jenbortemi iba lendong ataloker küm 40 ajungba anogo parnok nem temenok tapet agütsütsü khanga PM dangi zülü a shiti bener Bhopal kübok Union Carbide factory anasa longkak aitba noksa nung angur.



बैंक ऑफ बड़ोदा
Bank of Baroda

KOHIMA BRANCH
National Highway 61,
Kohima, Nagaland - 797001
Email: kohima@bankofbaroda.co.in

GARI AYOKTSÜ

Bank of Baroda, Kohima Branch-i Smti. Sentila Jamir atema finance sütsüba gari/Equipment sen apur dang nungi puogo aser tayoktsü atema yua lir.

Iba gari alizüktsü janrangtemi gariji reprangdangtsü aser gari indang osang tejangja metettsü atema tsünglanglen sign süa alir den tongteprateptsü akok. Offer letter denji külemi Earnest Money Deposit (EMD) ama gari atema **Rs.14,000/- (Rupees Fourteen Thousand Only)** refundable/adjustable Banker's Cheque/DD alitsüla.

Gari alizüktsü janrangtemi offer letter ji sealed envelope ka nung "Quotation for purchase of vehicle No. NL-01/TA-0392" aser tsünglanglen shia aliba gari tening agütsütsüla aser kasaji **04.01.2025** anogo nikongdang 4:00 ako tashi nung tsünglanglen sign süa alir nem agütsütsüla. Sealed quotations ji Bank of Baroda, Kohima Branch premises nung **04.01.2025** anogo nikongdang 5:00 ako nung offer letters agüja alirtem lia lapoktsü.

Takok angur bidder-i shia aliba jenjangji quotation lapokba anogo nungi tenzuka working days 05 (Five) tsüngda ajak agütsütsüla mesüra Branch Head-i mapang atsulangtsüba tashi nung agütsütsüla, yamaji mesüra pai agütsüba EMD ji mangutsü aser gariji idangjisa ayoktsü. Gari/Equipment ji "Kong aliar yamaji" ayoktsü aser Bank-i latetba reserved price dang nungi tajemba agi mayoktsü.

Kuli kecha makai offers agizüktsü mesüra magizüktsü atema tsünglanglen sign süa alir dak temeden lir. Gariji Bank indang business anogotem aser mapa inyakba mapang nung reprangttsü akok.

| Sl.No. | Vehicle Make and Description | Reserve Price |
|--------|---|----------------|
| 1 | MARUTI ALTO STD (NL-01/TA-0392) Engine No.: F8DN6252835 Chassis No.: MA3EUA61S00F00656 Year of Manufacture: 08/2019 | Rs. 1,40,000/- |

Date: 04.12.2024 **Branch Head**

Place: Kohima **Bank of Baroda, Kohima Branch**



TIR YIMYIM YIMOBILEM (EDITORIAL)

DIMAPUR RASEMNÜ, DECEMBER (LUCHII) 04, 2024

Tayoker o talir na

Shishilemba tesem dang masü saka alima nung benjong mapang ya tayoker o talirtem na ajurutepdak lir. Aji oda, tanü putu nung benjong amongba ya nisung aika asoshi ayangtsü mapa tajung ka angu amai senotsü ajangzükdak mapang tajung ka akümer. Atangji, asenok asoshibo benjong ya sen endokba benjong asütsüa akok saka tangar asoshibo benjong ya sen aaba mapang tajung ka lir. Aji oda, kar benjong among dang senotsü endoker aser kar ajangzükter aser tenaprongla jagi benjong mapang longsudaktsür, anungji tayokertem o talirtem na pronglaji benjong nung shilem agir tajung kaka lir. Ibaji kodang bilemdangdir, tayokertem dang nungibo, ano, talirtemang tongtibangba, kechiyong tayoker aliyonga talir melira tayokertem akoksatsü aser tayokertem akoksaba jagi alima akoksar. Anungji, koba lima nung südirsüaka, government asoshi teinyaktsü tongtibangtibaji nübortemi pei nungdak alitetsüsa aser nübortem keti senotsü arutsüsa mapa adokdaktsüsbaji asütsü. Nagaland nungbo nübortem keti sen aruba lenmangji government mapa inyakerem nem ita sen agütsüba ya dang lir. Ajisüaka, ita sen kija agibo, talisa, benjong mapang pei nungdak periabo malitetsü, anungji government-i ita sen agüja inyadaktüsüba mapatem dang nungibo peisasa ayanga senotsü aatsüsa government nung alirtemi nübortem dang lenmang sayutsü tim. Akhidang, government-i dang industry lapoka nübortem nem ita sen agüja ayangdaktsü. Iba putu nung item sentongtemjia junger amato asü saka government-i lapokba industry kata takok menguteti shibangogo. Ibaji kecha tesümgangtsü mali, kechiyong government akümba ya industry lapoka business inyaktsü asoshi akümba masü saka nübortem dang lenmang sayua industry lapokdaktsütsü aser business tapu balala inyadaktüsütsü asoshi akümba yimten ka lir. Iba nükjidongji, tanü putu nungbo, government nung alirtemi dang masü saka nübortemia angatetsüla. Aji oda, tanübo, taoba mapangtem nung ama, nübortemi paper mill mesüra sugar mill shia arudakja government kibur sür anepaludaktsütsü bilemra, asenok bilembaji government akümba nükjidong aser tanü putu tangatetba den meputep asütsü. Kasaji, government nung alirtemia government-i business inyaktsü bilemra government nung dang masü saka nübortem rongnunga auer dang poktetsü. Atangji, tanü asen lima nung nübortem ket nung nungdak alitsü sen maliba ya nübortemi nungdak mapa reprangteta meinyakba agi asütsüa akok saka nübortemi peisasa apiteta senotsü aatsüsa mapa reprangteta meinyaktetbaji government nung alirtemi mapa inyaktsü lenmang junga mesayutetba agi asütsü. Akhidangbo, gari lenmang ka lapokba nunga nübortem ayangdak ngua pei nungdakbo peritsüsa senotsü aatet, saka tanü asüngbo ali mapa inyakba ajunga machine agidang inyaker asünungji nübortem ayangdak maka kümogo. Ibaji reprangteta, government-i nübortem dang peisasa mapa inyaka senotsü ajangzüktsü lenmang sayutsü tim. Asenok ket nung ali aser arem lir, yangji aliba süng long aser süngotu tashiji asenok rongsen lir, anungji item rongsentem jagi sen akümtsüsa government nung alirtemi lenmang sayua nübortem ajungshitsüla. Iba amaji asenoki asenoksasa rateta meinyakba agi asenokbo tayoker-a masü aser talir-a masü ta kecha meinyak election aru atartem ama dang akümer. Iba mekokmein ajanga tang ama Kisama nung hornbill benjongmung nung chiyongtsü, sübosülemtsü aser osettsüset tapu balala bener arua yoka menaka, talir mali tayokertem kanga akoksar. Ajisüaka, ano külen Dimapur New Market nungbo senpak 50 agia süoshi tajung ka angur, anungji Kisama nung kecha mayokdang, Dimapur nungbo dokan azünga ayoker aser asen akaba ajak tsümar nem agütsür. Ibaji koda ta bilemdanga, tayokertema asenok aser talirtema asenok ta asütsüsa government nung alirtemi nübortem dang mapa sayutsüla aser nübortemia peisasa mapa kabo apiteta inyaktetsüla.

OLEMSABANG

AO OSHI OJANG KAR MEDEMDANGBA

~ P. Renthly Jamir.

Ao oshi orülem (Grammar) nung tazüngertemi meteta alitsü temesüktep ojang kar:-

Oren ka nung ojang tongtibangbaji teinyakba ojangti (Verb) ta ajaba ya lir. Anungji ojangti kobasa TEP agi orenji tema lir, tatishitsü takok toktep, tai toktep tetsür süzüng tsüktep mapa atep, kidangi otep, yamala aika lir. Item rongnung temesüktep ojang kar agiteta zülur.

- ASEMTEP / ARITEP:-** Ojang ana ya kasa mesük saka tera balala asemtep süra tetsüng agi asemtepba. Takok angutsü asemtep. Aritep süra tetsüng agi aritepba asütsü akok ano mapa atemtsü aritepba asütsü akok. Alu akoktsü aritep. Ki atongtsü aritep.
- ALENTEP/ARAKTEP:-** Ana ya mapabo kasa saka alenteper süra lisü, süngzü, Arr, item agi alenteper. Araktep süra yong agi arakteper. Süng tuluba ana arr agi alenteper. Süngküm ana yong agi akanga araktep. Ano lisü tasüra nisungi yangluba süngzü ta süra süng tezü züra aobatem. Yong süra au agi yangluba.
- APANGTEP/AZÜTEP:-** Ana ya tera balala apangtep süra teka külen apaktepba. Azütep süra tepen anaprongla azütepba. Parnok tsüngsangtsü apangtep. Azütep süra tepen anaprongla azütepba. Jabaso tanubusang ajuruba atema tena azütep.
- AREMZÜKTEP/AZÜZÜKTEP:-** Ana ya tepila mali. Kecha masüar tai tokdi ta aremzüktep. Parnok kati ka tai mebushi azüzüktep.
- ANITEP/AYONGTEP:-** Ana ya tera balala anitep süra ataloker inyaker, ayongtep süra ano jembiaang ayu. Aiürla O asangursang na anitep. Aniteper ajen. Ayongtep süra ano aotsü maotsü memetet. Parnok aremi aotsü ayongtep.
- AINTEP/LANGTEP:-** Ana ya tepila mali aintep toktep langtep langzüktep. Tanuri tetsü den O kata metsükdaktsü aintep kidanger ana raratepba kasa kasa langtep.
- AJURUTEP/TENCHITEP:-** Mesükteper saka tera balala talangka pila-a lir yashi ajurutep. Tayoker O talir na tenchitep.
- AZÜNGASHITEP/NANGZÜKTEP:-** Ana ya balala azüngashitep süra tajung tamajung. Nangzütep süra tajung. Yim ana kati par li ta kati par li ta ali chitepa azüngashitep. Arogo ana tai nangzüktep.
- AKANGTEP/JUNGSHITEP:-** Ana ya kasa takar kati ka den akangtep. Yimti O yimti na toktepa jungshitep.
- ASAYATEP/MENÜTEP:-** Ana ya tera balala asayatep süra karbo mepelatsü akok. Parnok asayatep saka karbo O küma jashitep. Khristmas benjung nung pelatepa menütep.
- AJINÜTEP/MEIMTEP:-** Ana ya tera balala ajinütep tama meimtep tesü, tena memetetep saka ajinüteper. Tena ajurutepa meimteper.
- ATENTEP/METENTEP:-** Ana ya tepila mali saka tera balala süklep ter, ter anana atentepa agi. Kasa O kasa na atentep. Am ter agi matong ano ka metenlok talang ka tatsü ka metentep.
- AGÜTSÜTEP/TSÜTATEP:-** Ana ya kasa agütsübasu lir kiyonger den aonsotsü agütsütep. Tangar kuli mali tena O tena na tsütatep.
- ASÜKTEP/RARATEP:-** Ana ya tera balala asüktep süra teka sangshia asüktep. Raratep süra teka sangshia mesüra tebang O agi raratep asütsüa akok. Süng amshia züktep tepang agi raratep.
- ASATEP/LULUTEP:-** Ana ya asatep süra telok mapa inyakdang asatepba ola asütsüa akok ano kar raratepa asatep asütsüa akok lulutep süra telok kecha kuli maka ka nung nünngüngtepba dang laulutep ta ajar. Yasüng telok ana kanga asatepa lulutep.
- AOKSATEP/PUSATEP:-** Ammang nung per ka ngur aoksatep kecha masü nung pusatep. Aoksa langka tsüngkenbusa lir. Pusatep süra karbo pusapulem mazü kuli maka pusateper.
- ANÜNGTEP/SENSAKTEP:-** Ojang ana ya kasa saka tera balala nung jembir. Anüngtep süra aika mesüra ka agi tzü agi anüngtep kidang kecha tachitsü maka Israel nungertem sensaktep.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeri angateta agitsü mepishir

Nagaland Conservatory of Music Choir-i Zunheboto sangwatsü



Dimapur, December 3, 2024 (TYO): December 1, 2024 nü Sumi Baptist Church Zunheboto-i kümshia agiba Advent Christmas sentong ayongzüka among aser idakji Nagaland Conservatory of Music Choir-i tetushi süa jaokertem ama shilem agia liasü. Iba sentong nung Dr. Hutton Sumi-i Christmas tree tsüklokja

tenzük aser Sumi Kukami Hoho President Akukau Hetoho S. Zhimomi-i tajungshi o jembi. Sumi Baptist Church Zunheboto ya Asia nung tenla ki tulutiba rongnung ka lir aser Nagaland Conservatory of Music Maestro, Lipokmar Tzudir-i anir Nagaland Conservatory of Music choir-i ken atenba angatsü atema Deobarnü nisung mesemi

adenshia liasü. Iba sentong nungsa Tonani Obedto Chishi aser SBCZ Choir nungeri ken ajanga shilem agia liasü. Nagaland Conservatory of Music-i December 18, 2024 nü Nagaland String Orchestra den külemi NCM Campus, Darogapathar nung kentenba sentong ka agitsü.

Notre Dame tanaben lapokba nung Trump adentsü



Paris, Luchii/December 03 (Agencies): Küm pongu jakdang Paris nung mi agi rongdokba nungtugu Notre-Dame tenlaki tanaben lapokba nung adentsü, ta Donald Trump-i sangdongogo, koba United States tir election nung takok anguba sülen bendang limai mezüing aobaji aji alitsü. Century 12 buba nung yangluba tekülem ki ya April 15, 2019 nung mi adoka kanga mejungi rongdok, koba tesemdanger aser Catholic nung asoshi Honibar aser Deobar anogotem kishi tanaben lapoktsüsü renema lir. Iba tenlaki yanglushir semzükba sentong nungya linük balala nungi lenirtem arua adentsü imlar, koba France Tir Emmanuel Macron-i 'linük zübu' ka taneptsü anguba amai jembir. "Küm pongu tejakdang mi agi rongdokba nungtugu aser otsü aketba Notre Dame Cathedral yanglushir tanaben lapokba nung adentsü asoshi ni Honibarnü Paris, France-i

aotsü," ta Trump-i pa indang Truth Social sapang nung Hombarnü ashi. "Akhi mapang ama aser iba dang nungi tajungba nung wangshi-wangshia Notre Dame yanglutsü asoshi Tir Emmanuel Macron-i mapa tajung inyakogo. Ibai ajak asoshi anogo balaka asütsü!" Trump ya US tir ama kümsük mezüingbuba inyakdang Notre Dame nung mi kaolokba noksa tem alima ajunga nung prokshia liasü, aser iba mapang pai mi remseptsü atema "flying water tankers" amshitsüla ta shia liasü. "Kanga kera inyaktüla!" ta Trump-i Twitter (tangbo X ta melenogo) nung shia liasü. Ajisüaka France ketdangstür temi aji magizük, aser water-bombing aircraft amshiba ajanga cathedral ajunga chireptsü ta shia liasü. Trump aser Macron na tesendaktep ya tera tepenja nung lia aru. Trump-i US tir election nung takok anguba asoshi

tenüingsang agütsür lenirtem rongnung Macron ya mezüing liasü aser taoba tir indang mezüing state dinner nung pa tetushi tesemdanger liasü. Ajisüaka lenir ana ya Trump-i NATO dak tamang makatetba aser France-i US tech giants nung saru tali meshiba atema mangatettep adoka aru. Notre-Dame yanglushiba nung linük 150 nungi tetenlar nisung 340,000 ajanga sen 846 million euros (\$887.4m) tenlatetba ajanga mapa takok angu. Küm pongu iba tenlaki yanglushiba nung company 250 shi, takotet nisung noklang aika densemer iba maparen ya sen 700 million euros (\$734.3m) jungnüa agi renemtsü südi ta asadangteta liasü. Tenla nung talila sen 140 million euros (\$147m) aruba ya tarutsü nung lendong timtem nungi wazüka ayutsü atema amshitsü, ta restoration chief Philippe Jost-i taoba ita osangbener senden ka nung

ANOGO ABEN TSÜNGREM DEN

Temeimtsü maketba meimang

"Saka adianu meimtepba indang nenok dangi zülutsü tenüingdaksü maka, kechiaser medemer o medemer na meimteptsü Tsüngremi nenok dang sayur". 1 Tesalonika 4: 9.

Mission field nung tebilemstü tulutibaji kechi? Telangzüba tajungtibaji, Arogo nung tebilemstü tulutibaji kechi asütsü? Atangji, arogo nung kati ka dang memeimtetba ajanga mission field nung tebilemstü adoker.

Arogo nung telemsaji tsükchir takok tulutibaji lir. Arogo nung rongrong, mangatettep aser o atsütepba mamangertemi angashir. Parnoki mangatetepi aliba telok ka nung parnok adentsü menüingdak ta lemteter.

Shirnoki tangar jangyu medema mouteter kasa nisung jagi pa temetetbaji ano tali telemsa adokdaksüba mapa nung amshitsü meranger. Telok shiai pei meden bushitepa kuli bendentsü aser tanela jenjang nung parnok tajungba ta bilema tangarji mezüingmeshitsü.

Iba tesayuba ya kodang tamanger kati Khrista pei Kibur ta agizüker, iba nungji kati ka dang meimtsübaji keta aliba jakla ka lir. Tasen akümba mulungsentsü, Tanela Temeshi aliba, aser Khristai asenok dang meimteptsü bilemtetdaksür. Tanela Temeshi tejang temeim iir.

Oba, tamangertem rongnung meimteptsü ozüing agütsüba asoshi Ne tenüing asanger.

Sadiq Ali Shihab Thangal-i Pope Francis ajuru



World Interfaith Conference mapang Kerala nungi lenir aser tamangba yimsü shisashir Panakkad Syed Sadiqali Shihab Thangal-i Vatican City nung Pope Francis ajuruba noksa nung angur.

Vatican City, Luchii/December 03 (Agencies): Kerala nungi lenir aser tamangba yimsü shisashir Panakkad Syed Sadiqali Shihab Thangal-i tawa World Interfaith Conference nung adentsü atema Rome-i ao aser yangji Pope Francis ajurua liasü. Sivagiri Mutt ajanga ayongzükba mungdang nung shilem agitsü asoshi Thangal-i Vatican City semdang, kong Pope Francis-i moatsüba o jembia liasü. Iba mungdang nung India tenüing nung shilem agitsü atema Thangal ya jaoka liasü. Pai Pope ajurudang, Thangal-i pa nem 'Islamic Art and Architecture: An Introduction' kaket agütsü. Mungdang mapang Pope Francis-i Indian philosopher Sree Narayana Guru-i sangdongba osang athishia jembia aser nisung meimchir ajunga kibong ka nungi lir ta

ashi. Sree Narayana Guru-i lokti ajungkettsü aser ajak kasa kumdaksütsü asoshi pa takum bendanga agütsür inyak ta Pope Francis-i shia liasü. Guru-i alima nung telemsa malitsü sayuba ya telemsa adoka aliba putu nung kanga tongtipang kumogo, ta Pope-i ashi. Sarva-Religion Conference nung Pope-i moatsüba o jembidang item ya athishia jembia liasü. World Interfaith Conference nung adentsü atema Sadiqali Shihab Thangal ya November 27 nü Rome bushia ao. Iba mungdang ya arok temeimtep mapang ka liasü, ta pai ashi. Tangatetba aser tesayuba balala ajanga alima nung telemsa tali adoka alidak lokti adenshiba ajunga nung kati ka ajangzüktsü asoshi yariteptsü aser tangatettep nung külemi alitsü asoshi osang prokshir, ta pai ashi.

AO OSHI ANGAZÜKDAK:

TANÜ ANGAZÜKTSÜBA OJANG



Tasür

(n) taküm tembanger (dead)

* Arogoi tasür kibong den sarasadem mapang agi.

Tasüra

(n) nisung asütsüsa kangshiba tashidak (life threatening disease)

* Tasüra agi kangshira yakta mozü ki atongtsüla

OLONG PAITEP # 7001

| | | | | | | | | | | |
|----|--|---|----|----|--|----|---|--|----|---|
| 1 | | 2 | | 3 | | 4 | 5 | | | |
| | | | | | | | | | | |
| | | | | 6 | | | | | | 7 |
| | | 8 | | | | | | | | |
| 9 | | | | 10 | | 11 | | | | |
| | | | | | | | | | | |
| | | | 12 | | | | | | 13 | |
| | | | | | | 14 | | | | |
| | | | | | | | | | | |
| | | | | | | | | | | |
| 16 | | | | | | 17 | | | | |

TIPIEN

- 1. Nisung jenti
- 4. Tsük rudenba
- 6. Temzüng tesashi
- 8. S ___ i
- 9. Nisung telemsa
- 10. Anogoshi
- 12. Ajanga aor
- 13. Tsük rizüngdak
- 14. Tebang nungi adokba
- 16. Süngdong tatembangtiba
- 17. Meputep

LANGTSÜNGLEN

- 1. Tenük telong
- 2. Committee dang ajar
- 3. Yagi ki okdoker
- 5. Yim lenmang
- 7. Temoatsü keter meyipa aruba
- 11. Kanga junga menemba
- 12. Majinü
- 13. Tzüma nung senzüba

OLONG PAITEP # 7000 TELANGZÜBA


TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

NAI-A YA METETTER MA



Alima nung Largest Single-Brand Restaurant Chain ji Subway ta ajaba American multinational fast food restaurant lir ta World Record Academy-i metetdaksüogo. Subway IP LLC ya Fred DeLuca ajanga tenzük aser submarine sandwiches (subs) o wraps yanglur, linük 100 tema nung Subway restaurant 37,000 tema lapoka lir.

Subway indang restaurant tesadang ka den tema 21,796 (58.1%) United States nung lir aser iba ya largest single-brand restaurant chain aser largest restaurant operator lir. Subway indang international headquarters ya Shelton, Connecticut nung amenoka lir.

Naga tsürtemi ZUF aser NSCN-IM khatepba anema lungkak ait



Imphal, December 3, 2024 (Agencies): Manipur kübok Noney district nung Naga tsürtemi telungpur teloktem tsüngda raraba anentsü takhangba agüja sentong ka agiogo.

Tawa Zeliangrong United Front (ZUF) aser National Socialist Council of Nagaland, Issac Muivah (NSCN-IM) na tsüngda khatepba atema Women's Society of Tupul

Area-i iba lungkak aitba sentong ayonga agi.

Naga tsürtemi telungpur telok anaprong dang azütokshitepba anentsü aser yimjung asoshi temulung agütsütsü ayongzükogo.

Deobarnü Longsai (Nungsai) Chingkao Part I area nung telungpur telok ana tsüngda khatep.

November 28 nunga Sangji aser Dollang yimtsüngtem

anasa khatep saka tia ka nisung yiruba mesüra asüba osangbo kecha mali.

NSCN-IM-i ZUF ketdangsüba tesemi aitogo aser iba ajanga nübortem asoshi tetsübu tia ka bentsür aruogo ta ZUF-i tai tongloksür.

NSCN-IM-i tebilemba tamajung bener mapa inyakba manen tashi ZUF-i parnok anema mapa inyaksü ta metetdaksüogo.

PM Modi-i February 2025 nung Assam semdangtsü

Guwahati, December 3, 2024 (Agencies): Assam Chief Minister Himanta Biswa Sarma-i Hombarnü New Delhi nung Prime Minister Narendra Modi den ajurutep aser terenlok mapa balala lemsatepogo.

Senden nung CM Sarma-i Prime Minister dang February 24 & 25, 2025 anogotem sentong ana nung adentsü jaok. Idangji PM Modi-i Assam

Investor & Infrastructure Summit aser Mega Jhumur Performance nung adentsü agizük.

"Tanü New Delhi nung ni Prime Minister Modi dang nungi terenlok mapa balala atema shisatsü nguogo. Ni pa dang February 2025 nung Assam Investor & Infrastructure Summit aser Mega Jhumur Performance nung adentsü jaokba pai

mulunga agizükogo" ta CM Sarma-i ashi.

Mega Jhumur Performance ya sobaliba sentong tulu ka lir. Jhumur ya Assam nung sobaliba tsüngsang ka lir aser süngo lu ayimertem den sendaktepa lir.

Assam Investor & Infrastructure Summit ajanga Assam nung industrial aser infrastructural development lenmang balala lemsateptsü nükjidong lir.

Meira Paibi temi Arambai Tenggol pusema lungkak ait

Guwahati, December 3, 2024 (Agencies): Manipur nung Meira Paibi temi sorkar dang Arambai Tenggol lennir Korounganba Khuman maputsü atema takhangba agüja lungkak aiter.

Manipur kübok tesem balala nung Korounganba Khuman anema FIR benoka aliba atema lungkak ait.

Arambai Tenggol dena Meitei village volunteers ya telungpur mesüra kiralongrar masü ta Meira Paibi temi ashir.

Parnoki Kuki nunger dang nungi Meitei nunger kümzüka ayur kechiyong sorkari nübortem taküm aser rongsen kümzüka meyteter.

Manipur nung telungpurtemi Meitei nunger amakba ajanga tensa mejungi aküm aser iba nung kinü tanurtem, tetsür aser lennirtem dena Meitei civilian aika tepsetogo ta Kangpokpi nung tetsür kati ashi.

NIA-i Korounganba Khuman dak tai tongloksüba magizüker aser sorkari item ken

o agientsüla ta Meira Paibi temi ashir.

National Investigation Agency (NIA)-i Manipur nung police amakba aser prangpong-injang auyar aoba ken o ana bushisüngdang.

Item ken o ana nung Meitei telok Arambai Tenggol (AT) tanishisang Korounganba Khuman dena lir.

Manipur nung tensa majungba ajanga Supreme Court-i item ken o Imphal nungi Guwahati-i belenogo.

GOVERNMENT OF NAGALAND
DIRECTORATE OF YOUTH RESOURCES AND SPORTS
NAGALAND: KOHIMA

NO.DYRS/Youth-PMKVY/2024
 Interested candidates are hereby invited to undergo free training course in the following Job role under PMKVY 4.0 Scheme, fully sponsored by Ministry of Skill Development and Entrepreneurship, Govt. of India and Implemented by DYRS Department. Kohima Dated: 3rd Dec. 2024

| Job Role | Training Hrs/Duration | Eligibility | Training center location |
|--------------------------|-----------------------|--|--------------------------|
| Drone Service Technician | 300hours | i) 18-45years ii) Class 12th passed | Kohima and Tuensang |

- Enrolment shall be done on first come first basis.
- Last date: 15th December, 2024.
- Tentative Start Date: January 2025

Eligible candidates may Visit www.nagabots.net to register

OR
SCAN THE QR CODE

For Queries Contact
 (Monday - Saturday: 9:00am - 5:00pm)
 70021 58836/9366594691
 For Forms Visit:
 NAGABOTS Office, Flat No. 103, 1st Floor, Mabel Tanquist Memorial Building,
 Neituo Rd, above NCC Office, Kohima.
 NB: Aadhaar should be linked to phone number.

Sd/-
 Director Youth Resource & Sports, Nagaland:
 Kohima

Menungra Bilemteter



Asü : 4th Dec. 2023

Asür Nüngshichizung Ozukum (Mongsenyimti)

Kibong nung tebuti akhümket samar joko tanü küm ka renteta aruaka nai onok doktsür aieni aoba kidangi meshilang mesüka onok mulungjang nung teti menungra bilemteter. Na onok den meliaka tanü ne nem akhüm agüja onokia sarasademja amongera ni.

Temeim Kinungtsü, Jala-jabaso & Semchirtem.

Longsa Lumong Semchir Mokokchung Town

TENÜNGSANG AGÜTSÜR



Nagaland State kübok tawa adokba NPSC (CTSE) tatidang result nung Wt. Narola aser Lt. Supongmayu Jamir, tena jabaso Sb.Temsulemba Ao, No 1 jenjang nung SDO (Electrical Engineering) Group A Power Department kübok takok khonang tulu bener arutsüba asoshi ozü lumong semchir aser ilangtsür ajaki pelaba lemsateper. Teyanglur Tsüngremi ne taküm aser wadang tali moajangma.

Imtisenia Jamitsür
President, Ilangtsür

Takomanen Jamir
President, LLSMT

Office of the

Longkhum Students' Union

Mokokchung: Nagaland

"Higher the altitude, broader the horizon"

TENÜNGSANG AGÜTSÜR

Longkhum Students' Union (LSU) züngsem nungi lenmang balala nung takok ngutetba asoshi tenüngsang aser tetushi agütsür.

1. Sb. Imkumwapang, S/o Wb. Arenjaba Ao, Nagaland University MA (Psychology) 2024 tatidang nung Gold Medal ngutetba,
2. Kr. Wathynaro Longchar, D/o Wb. Tatong Longchar, NPSC -1/CTSE 2024 tatidang nung Fishery Inspector (Class-III Non- Gazetted), Fisheries & Aquatic Resources Department ngutetba.

Tsüngremi nenok taküm aser wadang ano maneni moajangma.

Sd/-
Moachiba
President, LSU

Sd/-
Longrichila S. Jamir
Secy.Info & Public Relation

1994 security tenangzüktep nung tamakok anguba Ukraine-i aitsü

Kyiv, Luchii/December 3 (Agencies): Ukraine-i küm 30 tain security tenanzüktepba ka aitsüogo aser parnok NATO nung züngoksemtsü atema maneni nenshia metetdaksüogo.

Ministry of Foreign Affairs-i Mongolbarnü Kyiv nung, 1994 küm yangluba Budapest Memorandum aitsüogo, kong Russia aser anüolen aliba linüktemi security dak sendakba nung guarantee agütsüba sülen nüjiso anguba linük tasenba yagi alima nung nuclear arsenal tulutiba rongnung tasembuba ya bendanga agüja liasü.

NATO senden nung Russia den rara anentsü atema sensaksemtsü asoshi imla aliba mapang ka nung tang Kyiv-i iba taitsüba ya agütsüogo.

"Ukraine nem shitakba security guarantee agütsü aser tarutsü nung Russia-i Ukraine aser tanga linüktem amakba nokdangtsü asoshi lenmang ajak agi Ukraine NATO nung adentsüba ya dang lir ta asatetogo," ta Foreign Ministry-i ashi.

Budapest Agreement kong United States, United Kingdom, Russia, Ukraine, Belarus aser Kazakhstan nungeri sign süa lir, iba tenangzüktepba ya mapang tatsüka atema dang bilema yangluba ka liasü, ta kasa sangdong ajanga metetdaksü.

"1990s nung Ukraine nem shitakba aser tetangshi security guarantees magütsüba ya strategic aibelen ka liasü, koba Moscow-i maogka agia arudar. Iba aibelen ya metongshitsüla," ta Foreign Ministry-isa shisem.

Iba tenangzüktepba yanglur iba hopta küm 30 ajungba mapang NATO indang foreign minister tem Brussels nung Ukraine rara indang sensaksemtsü asoshi adenshitsü lia tang Ukraine-i iba osang ya lemsatepogo.

Donald Trump-i election teyari agütsütsü magütsütsü mejangja aliba mapang ka nung Kyiv-i parnok kangshia sensaksemtsü akümtsü akok ta tsüba bilemer.

Budapest Memorandum den külemi Ukraine sorkarisa Minsk agreements aitsüogo, koba ajanga 2014 küm Russia-i Crimea atsüngba sülen ceasefire ka benoka liasü aser iba sülen linük anütoklen Russia pusemertem den raratep tenzüka liasü.

"Budapest Memorandum aser Minsk agreements joko ojadang südi. Anabenji teperi, onok kasa sang nung tasembenbo masotsü," ta Ukraine tir Volodymyr Zelenskyy-i ashi.

Kangshia ceasefire benoktsüsa küma Ukraine litsü Russia tazüokba kübok toktsütsü aser linük nung tanungba tesemtema tarutsü nung maneni amaktsü akok ta tsüba bilemba mapang Kyiv-i NATO dang parnok indang security alliance nung formally adentsü atema jaoktsü asoshi takaratiba nung jenjang agitsü mepeshia arudar.

"Budapest Memorandum ajanga tajangshiba tamajung agütsüba sülen onoki Ukraine NATO nung adentsü atema full membership dak alaka tanga kecha magitsü," ta Foreign

Ministry-i ashi.

"NATO nung adentsü atema Ukraine jaokba ya Russia inyakyim atema telangzüba tajung agütsütsü asoshi tetangshi akümtsü aser Ukraine indang Euro-Atlantic integration raksatsütsü akok ta Kremlin-i bilema aliba matalokdaksütsü," ta ministry-isa shisem.

Trump-i election akokba sülen Kyiv-i parnok nem security guarantees agütsütsü asoshi taliba ayongzüka arudar, shibai rara takaratiba nung tembangdaksütsü nangzüka den Ukraine-i tongtibang telemtetba kar agitsüsa akümtsü, ajita mesüra US-i prangbong injang aser hadir balala teyari agüja aliba magütsü akümtsü, ta shiogo.

"Trump-i kodang supply ajak nokdangdir iba mapang onok jenjang kanga mejungi akümtsü akok ta bilema renemdar," ta taoba mapang Ukrainian Armed Forces, General Staff deputy tekolakba Lieutenant General Ihor Romanenko-i tawa Al Jazeera dang ashi.

Trump tir mendeni atutsü aliba atema renemshiba mapang Zelenskyy-i ashiba agi, sensaksemtsü atema par linük renema lir, saka NATO nung züngsem kümdaksütsü nangzüka amala tanga security tsütsü tenangzüka takang yanglua yurang sensak asemtsü.

Ukraine nung küm asembuba radar aser iba rara nung Russia aser Ukraine nunger sepaitem meyirejang aika taküm samaba den yiruogo aser iba ajanga linük anaprongla nung nübu agi ajema kümogo.

Russia-i rara nung teyari agütsütsü atema North Korea nungi sepaitep meyirejang aika anir aruogo aser parnok Ukraine NATO nung adentsü meranga aliba ya aitsüogo aser ashiba agi, iba ya agizüktsü makokba security tsütsü amokmeren ka lir.

Ukraine-i Mongolbarnü ashiba agi, Russia nunger sepaitemi Oskil ayong adentsü meranga aliba parnok nokdangogo.

Kyiv-isa, Ternopil aser Rivne nung tongtibang tesemtem amaktsü atema Russia-i yokba drone 28 nungi 22 bo khazüka yokogo, ta ashi.

2022 küm February nungi Russia-i Ukraine amak tenzüka sülen asüka shia Russia-i Ukraine indang energy infrastructure maka arudar aser iba ajanga temperature kanga ajema akümba mapang power agi anünga küma nüburtem timtemdaksür.

Gaza nung pua alir nisung 33 tepsetogo: Hamas

Gaza City, Luchii/December 03 (Agencies): Israel-i ita 14 jungnüa raraba tenzüker Gaza nung ozü teloki pua aliba nisung 33 tepsetogo, ta Hamas-i ashir.

Iba telok yagi Hombarnü video sangdong ka agütsüba nung, "war criminal" Israel Ato Kilonser Benjamin Netanyahu temulung merangba aser pai tanen maka tashiyim amshia raraba mechi pua alirtem ya tepset, ta shia liasü.

Israel nunger pua alirtem chiochtsü asoshi ceasefire ka yanglutsü meranga Egypt, Qatar aser United States densema tetsüngtai ia yimjung ken o jembirtemi asendenshir meranga inyaktepba mapang Hamas-i iba sangdong ya agütsü.

Tawa Lebanon nung rara anena atatsü züngzüktepba sülen yimtenren tsütsü lenmang ka lapoktsü teimla anguba sülen iba mera ya agir.

Hamas indang video nungya pua alirtem tepsetba anogo shia liasü. Parnok timba tayimtsü amshia amakdang tepset. Ajisüaka karbo Israel mitkari kumzüktsü merangba mapang aibelen liasü.

Hamas ajanga ashiba agi, mezüngbuba nung Israel-i tayimtsü amshia October 9, 2023 nü amakdang pua alir nisung pezü tepset. Tesüsaba ya Gaza north tsütsü Israel mitkari taoba ita operation agidang pua alir ka tepsetba liasü.

"Nenoki tamachi rara maneni raraba ajanga, nenoki pua alirtem teti asoshi samatsü. Memonudang kechi inyaktsü nüngdaker, aji inyakang," ta video nung shia liasü.

Hombarnü White House ajanga sangdong ka nung Omer Neutra asüba indang mangyim jashi sangdonga liasü, shiba US senso ka aser Israel mitkar inyaka liasü.

Hamas-i October 7, 2023

nü Israel amakdang Neutra ya tepset, shiba army indang tank commander ka ama inyaka liasü, ta White House ajanga ashir.

US tir inyaktsü alisang Donald Trump-ia Hombarnü sangdong agütsüba nung, pua alirtem January 20 tashinung mechiokra timtem tulu alitsü ta shia liasü. January 20 nü pai US tir mapa agizüktsü.

Kasa mapang Palestine nunger Fatah aser Hamas telok nungi teshimtet nisungtem Cairo nung ajurutepa Israel indang rara tembangba sülen Palestinian Authority ajanga Gaza Strip ketdangtsüba nung tangatetep kati arutsü jembia liasü, ta Egypt indang foreign minister-i Hombarnü ashi.

"Palestinian Authority tazüokba kübok Gaza Strip nung anogoshi inyakyim ketdangtsütsü asoshi tekeraba nung tangatetep kati arutsü

atema jembishinütsü Fatah aser Hamas movements nungi delegations ana Cairo nung lir," ta Badr Abdelatty-i Cairo nung osangbener senden ka nung ashi.

Taoba mapang Netanyahu-ibo Palestinian Authority nem Gaza magidaktsütsü jembia liasü. Ajisüaka iba tesem ketdangtsütsü atema PA asendenshi nüngdaker ta US-i ashir.

Jembishinü aliba mapang Israel sepaitemi Gaza nung maneni bomb poklokja north tsütsü Jabalia aser south tsütsü Abasan al-Kabira tesemtem amak.

Anogo 60 jakdang Israel-i amak tenzüker talisa Gaza north tsütsü kanga mejungi raksatsüogo.

Israel-i October 7, 2023 nü nungi tenzüka Gaza amakba nung Palestine nunger nisung 44,466 tepsetogo aser 105,358 yirutsüogo ta ashir.

